

Newspaper	BERITA HARIAN
Date	03 JUNE 2017

Enggan angkat plakad bukti Tun M berminat jawatan PM

PH-3/6/2017 pg. 6

Kuala Lumpur: Parti Pribumi Bersatu Malaysia (PPBM) dicabar menamakan Tun Dr Mahathir Mohamad sebagai calon Perdana Menteri jika Pakatan Harapan (PH) memenangi Pilihan Raya Umum Ke-14 (PRU-14).

Kesediaan Dr Mahathir yang juga Penasihat PPBM mempertimbangkan jawatan Perdana Menteri juga menjustifikasikan keenggannya mengangkat plakad 'Anwar PM Ke-7' pada Konvensyen PKR, bulan lalu.

Menteri di Jabatan Perdana Menteri, Datuk Seri Azalina Othman Said, berkata kemungkinan PPBM perlu mengambil tindakan sama seperti PKR yang menamakan Ketua Umumnya, Datuk Seri Anwar Ibrahim, sebagai calon Perdana Menteri Ke-7.

Beliau yang juga Ahli Majlis Tertinggi UMNO berkata, Dr Mahathir ibarat bermimpi di siang hari apabila mengeluarkan kenyataan bersedia menjadi Perdana Menteri kali kedua.

"PPBM perlu melakukan tindakan sama dengan menamakan Dr Mahathir sebagai calon Perdana Menteri jika PH mentadbir negara," katanya ketika dihubungi, semalam.

Kelmarin, Dr Mahathir menyatakan kesediaannya mempertimbangkan jawatan Perdana Menteri jika dicadang dan dipersejui pemimpin PH.

Masih menyimpan cita-cita

Sementara itu, Setiausaha Agung Veteran UMNO, Datuk Mustapha Yaakub, berkata keengganan mengangkat plakad 'Anwar PM Ke-7' sebagai sokongan kepada Anwar untuk menjadi Perdana Menteri membuktikan Dr Mahathir masih menyimpan cita-cita untuk kembali memegang jawatan itu.

Katanya, Dr Mahathir mahu membuktikan hanya beliau layak menjadi Perdana Menteri terbaik yang boleh menyelamatkan negara sehingga sanggup bekerjasama dengan pembangkang walaupun terpaksa mengadai maruah dan prinsip.

Dalam perkembangan sama, Bekas Ahli Majlis Pimpinan Tertinggi PKR, Badrul Hisham Shaharin, berkata hasrat Dr Mahathir untuk menjadi Perdana Menteri disifatkan sebagai lucu ketika PPBM hanya memiliki satu kerusi Parlimen.

Katanya, dengan jumlah kerusi Parlimen PKR yang lebih banyak, Anwar jauh lebih layak menjadi Perdana Menteri Ke-7.

Dr Mahathir perlu mengisytiharkan kawasan yang hendak ditandingi jika berhasrat menjadi Perdana Menteri semula, katanya dalam kenyataan semalam.

Badrul Hisham berkata, selaku Presiden PKR dengan rekod integriti serta pengalaman, Datin Seri Dr Wan Azizah Wan Ismail adalah calon paling sesuai selaku Menteri Kewangan dalam Kabinet bayangan PH bagi Pilihan Raya Umum Ke-14.

"PH tidak tandus kepimpinan yang berjuang selama ini dan layak berada dalam Kabinet. Saya juga difahamkan selaku Presiden Parti Amanah Negara, Mohammad Sabu akan dilantik sebagai Menteri Pendidikan," katanya.